

Proyecto di Linear Park ta cuminsa otro siman



MINISTERNAN Otmar Oduber y Benny Sevinger lo duna inicio otro siman pa e proyecto di Linear Park, un proyecto cu lo contribui grandemente pa eleva e calidad di Producto Aruba. Manera ta conoci, esaki lo bira e Linear Park mas grandi di Caribe, na momento cu e keda

completamente finalisa, ta encera un total di 10 miya, for di aeropuerto te Arashi. Mirando cu ta trata di un proyecto di miyones di florin, Gobierno a tuma e decision cu lo realisa den diferente fase. E prome fase lo ta for di rotonde Las Americas te na Parke Wil-

helmina y lo tin un costo di 4.8 miyon florin. Gran parti di e proyecto aki lo wordo realisa cu fondonan di e Tourism Product Enhancement Fund (TPEF), cual fondonan ta wordo genera dor di entrada parcial di roomtax. E fondo aki a wordo crea dor di Minister Ot-

mar Oduber cu sosten di ATSA pa por tin fondonan disponibel pa mehora calidad di producto Aruba, y Linear Park sigur ta un proyecto cu lo contribui na esaki.

For di otro siman pueblo di Aruba y nos bishitantenan lo cuminsa wak con e cambionan lo cuminsa tuma lugar banda di nos beachnan den e area entre rotonde las Americas y Parke Wilhelmina.

Intencion ta pa crea areanan cu ta impactamente, luganan habri cu bista y espacio pa e parke aki bira uno activo, cu otro palabra, lo focus riba loke en berdad un boulevard mester representa rondona cu matanan bunita.

E Linear Park lo inclui fietspad, looppad, iluminacion, decknan cu afdak, parkeerplaats, lo tin bañonan, kiosk y espacio suficiente pa organisa actividadnan. Mester bisa cu e parke lo wordo construi di tal forma caminda lo proteha nos beachnan y nos santo blanco, mustrand asina

cu ta un proyecto no solamente bon pa desaroyo personal, fisico y turistico di nos isla, pero tambe cu ta bon pa nos medio ambiente.

Linear Park lo bira un proyecto cu lo contribui grandemente na mehora calidad di Producto Aruba y cada un di nos lo mira e resultadonan positivo dentro di algun luna mirando cu ta calcula cu e prome fase di e parke lo keda cla dentro di 6 luna.

Minister Otmar Oduber y henter Gabinete Mike Eman ta sumamente entusiasma cu e proyecto aki mirando cu e ta influencia positivamente tur aspecto necesario pa mehora calidad di bida di nos hendenan.



noticia@awemainta.com

Tel: 583-1400

Fax: 583-1444